



## ანზორ თოთაძე

### მალადობა ქალზე?!

მამაკაცისა და ქალის თანასწორუფლებიანობა საზოგადოების განვითარების პროცესის აუცილებელი პირობაა. გაერთიანებული ერების ორგანიზაცია გენდერულ თანასწორობას შემდევნაირად განმარტავს: „თანასწორობა ქალებსა და მამაკაცებს შორის (გენდერული თანასწორობა) ნიშნავს ქალისა და კაცის, გოგონასა და ვაჟის თანაბარ უფლებებს, პასუხისმგებლობასა და შესაძლებლობებს. თანასწორობა არ გულისხმობს, რომ ქალი და მამაკაცი იდენტურნი უნდა გახდონ, არამედ ის გულისხმობს, რომ ადამიანის დაბადება მამაკაცად ან ქალად არ განსაზღვრავს მის უფლებებს, პასუხისმგებლობასა და შესაძლებლობებს. გენდერული თანასწორობის მიხედვით როგორც ქალების, ასევე მამაკაცების ინტერესები, საჭიროებები და პრიორიტეტები განიხილება ქალებისა და მამაკაცების ჯგუფების მრავალფეროვნების და არსებული განსხვავებების გათვალისწინებით. უფრო მეტიც, გენდერული თანასწორობა არ არის მხოლოდ „ქალთა საკითხი“, იყი სრულად მოიცავს მამაკაცებსაც და ქალებსაც, რადგან თანასწორობა ქალებსა და მამაკაცებს შორის განიხილება როგორც ადამიანის უფლებებთან დაკავშირებული საკითხი და, ასევე, როგორც მდგრადი და ადამიანზე ორიენტირებული განვითარების წინაპირობა და მაჩვენებელი“.<sup>1</sup>

საქართველოში გენდერული თანასწორობის საკითხი მეტად აქტუალურად მიაჩნიათ, რადგან თითქოს არსებობს ოჯახში ქალის მიმართ ძალადობის, ადრეულ ასაკში ქორწინების შემაშფოთებელი მონაცემები და სხვ.<sup>2</sup> ოჯახში ქალის მიმართ ძალადობის ფაქტები მსოფლიოს ყველა ქვეყანაში და მათ შორის, მეტად განვითარებულ,

<sup>1</sup> გენდერული თანასწორობის შეფასება საქართველოში. თბ., 2012, გვ. 12.

<sup>2</sup> იქვე.

ცივილიზებულ ქვეყნებშიც არსებობს და, შეიძლება ითქვას, უფრო მეტად, კიდრე საქართველოში. რაც შექება ადრეულ ასაკში ქორწინების ფაქტებს, ეს მაჩვენებელი მართლაც გაიზარდა, მაგრამ არა შემაშფოთებლად. შემაშფოთებელი ის არის, რომ დასავლეთის ქვეყნებში 13-15 წლის გოგონების საკმოდ დიდი ნაწილი სექსუალურ ცხოვრებას წევა და გოგონები უამრავ პრობლემას წყდებიან, მათ შორის ჯანმრთელობისა და განათლების მიღების უფლების რეალიზაციის თვალსაზრისით. ცნობილია, რომ სქესობრივი ცხოვრების მხრივ დიდი მნიშვნელობა აქვს იმას, თუ როგორ იღებს პირველ სქესობრივ განცდებს ვაჟი და განსაკუთრებით გოგონა. როდესაც გოგონა სექსუალურ კონტაქტს იღებს როგორც ძირითადს, როგორც ადამიანის არსებობის უმთავრეს მიზანს, მაშინ გოგონები მთელ ახალგაზრდულ ენერგიას ვერ იყენებენ თავიანთი პიროვნების სრულყოფისათვის, ვიწროვდება მათი ინტერესების სფერო, ისინი ინტერესს კარგავენ ცხოვრებისეული მოვლენების მიმართ და ყველაფერი ადამიანური მხოლოდ სქესობრივი ცხოვრების გარშემო იყრის თავს. ხშირად სწორედ ამ მოვლენას აქვს აღვილი და ამდენად გამართლებულია ფ. ბუკონის სიტყვებიც: „თავაშვებული ახალგაზრდობა — შეთქმულებაა სიბერის წინააღმდეგ. ჩვენ ძვირად ვზღავთ საღამოთი დილით ჩადენილი ცელქობისათვის“.<sup>3</sup> შემაშფოთებელი სწორედ ეს არის, რაც მთელ დასავლეთ სამყაროს ემუქრება. რაც შექება ადრეულ ასაკში გოგონების ქორწინების ფაქტებს, იგი ჩვენს ქვეყანაში პოლიტიკურ, სულიერ და ეკონომიკურ ცხოვრებაში მომხდარი კატაკლიზმების შედეგია და გარკვეულწილად უკანასკნელ წლებში კიდეც შემცირდა. ალბათ, ისიც საჭიროა ითქვას, რომ ამ საკითხში ვაჟებისა და ქალების თანასწორობა კარგ არათერს მოიტანს. ამ მხრივ შექსპირის, რომლის ეპოქას 400 წელი გვაშორებს და ამ ხნის განმავლობაში ადამიანის ცხოვრების ადათ-წესებში ბევრი რამ დადებითად შეიცვალა, გამონათქმამი „თავისუფლება კაცს მეტი აქვს, ვიდრემდე ქალსა“, უდაოდ ყურადსალებია. ადრეულ ასაკში გოგონების მიერ სქესობრივი ცხოვრების დაწყება უამრავ უარყოფით მოვლენას უკავშირდება და ეს, ზოგიერთ ფაქტთან ერთად, კარგად უნდა გაითავისონ სრული გენდერული თანასწორობის აპოლოგეტებმა.

ამ საკითხებს ჩვენ ქვემოთ ფართოდ შევქებით, ამჟამად კი ცოტა რამ ისტორიიდანაც გავიხსენოთ.

<sup>3</sup> ციტირებულია: რ. ჯალიანი. ოჯახის ანატომია. თბ., 1989, გვ. 34.

თანამედროვე ეპოქაში ქალზე ძალადობის ფორმები ზოგიერთ შემთხვევაში არ შეცვლილა და დღესაც ისინი დიდად არაფრით განსხვავდება, თუ უფრო მძიმეც არ გახდა, ძველ სამყაროში თუ შუა საუკუნეებში არსებულ ფორმებთან შედარებით. ძველ დროში სამართალი და მორალი განსაკუთრებით მკაცრი იყო ქალების მიმართ. ქალის ქმრის დაუკითხავად სახლიდან გასვლა საკმარისი მიზეზი იყო განქორწინებისათვის. ასეთი დრომოჭმული ზნეობრივი ნორმების შეცვლის აუცილებლობას მაშინაც კარგად გრძნობდნენ. ყოველივე ეს კიდევ უფრო შორეულ წარსულში იღებდა სათავეს, როდესაც ქალი სრულიად უუფლებო, ქმრის მონა-მორჩილი და მისი ყოველი სურვილის უყოფმანო შემსრულებელი იყო. შემდეგ საოჯახო და საზოგადოებრივ ურთიერთობათა სფეროში ქალის აუტანელი ძლიერობა მნიშვნელოვანწილად ტრადიციული წეს-ჩვეულებითი ნორმების ფარგლებში მოექცა, ღრმად გაჯდა საზოგადოების გონებაში და ხშირად ადამიანებს დღესაც უჭირთ ათეული საუკუნეების წინათ ჩამოყალიბებული ქალზე შეურაცხმყოფელი შეხედულებებისაგან თავის განთავისუფლება.

ძველ რომში კომედიოგრაფი პლავტე ერთ-ერთ კომედიაში მონაქალს, რომელიც თანაუგრძნობს თავის ქალბატონს, რომელსაც ქმარი ღალატობს, ათქმევინებს: კანონები უსამართლოა ქალების მიმართ. თუ ქალი სახლიდან ქმრის დაუკითხავად გავა, ქმრისათვის ეს საკმარისი მიზეზია განქორწინებისათვის, მას კი შეუძლია სახლში საყვარელი მოიყვანოს. მართლაც, ბევრ რომაელს შეურაცხმყოფილად მიაჩნდა თავი, თუ ცოლი მისი ნებართვის გარეშე სახლიდან გავიდოდა. ცნობილია, რომ ჩვენს წელთაღრიცხვამდე 304 წელს კონსული სოვა ცოლს იმის გამო გაშორდა, რომ იგი თეატრში მისი ნებართვის გარეშე წავიდა.<sup>4</sup> ასე იყო ძველ საქართველოშიც. „შუშანიკის წამების“ მიხედვით ქალს არ შეუძლია ოჯახიდან ქმრის დაუკითხავად წაგიდეს სადმე და ამით ქმრის „ხატი დაამხოს“. ახლაც, თანამედროვე ცოვილიზებულ მსოფლიოში, ბევრ ქვეყანაში სახლიდან ქალის დაუკითხავად გასვლა მიუღებლად და ოჯახის ღირსების შელახვად მიაჩნიათ. იორდანიაში მამამ ქალიშვილი რკინის ჯაჭვის ცემით მხოლოდ იმის გამო მოკლა, რომ იგი დაუკითხავად მეგობრებთან ერთად სასეირნოდ გავიდა ქუჩაში. ამჟამად ყოველწლიურად „ოჯახის ღირსების“ დაცვის მიზეზით მსოფლიოში 4 ათას ქალს უსპობენ სიცოცხლეს.

<sup>4</sup> Л. Винничук. Люди, нравы и обычаи древней Греции и Рима. М., 1988, с. 164.

გამოდის, რომ ქალთა უფლებრივი მდგომარეობის მხრივ თანამე-დროვე მსოფლიოში არაფერი შეცვლილა? შეიცვალა და თანაც ბევრი რამ. ქალი სულ უფრო დამოუკიდებელი ხდება, იგი ესწრაფვის სრულად გამოიყენოს თავისი ინტელექტუალური შესაძლებლობები, ზრუნავს თავის კარიერაზე, თანდათანობით ქრება დისკრიმინაცია განათლებისა და დასაქმების სფეროში. ყოველივე ამის განხორციელებაში ქალს მრავალ ქვეყანაში კანონმდებლობით მინიჭებული უფლებებიც ქმნარება. მიუხედავად ამისა, ქალის მდგომარეობა მაინც მძიმეა, განსაკუთრებით განვითარებად ქვეყნებში. ზოგიერთ შემთხვევაში ქალზე ძალადობა არანაკლები უხეში ფორმებით ხორციელდება, ვიდრე ეს იყო კაცობრიობის გარიუზრაუზე, ბევრი კულტურა უშვებს ძალადობას ქალზე და, რაოდენ პარალოქსულადაც არ უნდა მოგვეჩვენოს, ამას თვით ქალებიც ამართლებენ. საუკუნეების მანძილზე წეს-ჩვეულებას შესისხლხორცებული ქალის მდგომარეობის დამამცირებელი და შემლაწველი ფაქტები დღესაც გვახსენებენ თავს. ესეც რომ არ იყოს, თვით ბუნებამ შრომის სქესობრივი დანაწილების შედეგად ქალს, როგორც დედას, დიასახლის გარკვეულწილად შეუცვლელი და აურაცხელი საქმიანობა დააკისრა.

როგორი იყო ქალის უფლებრივი მდგომარეობა საქართველოში?

ქართული საზოგადოებრივი ყოფა, რა თქმა უნდა, არ ვითარდებოდა ჩაკეტილად, მეზობელი თუ შორეული ქვეყნების კანონმდებლობისაგან დამოუკიდებლად. ძველი სამყაროს ქვეყნების კანონმდებლობაში ურთიერთგალენის უამრავ მაგალითს ვწვდებით. და ეს არც არის გასაკვირი, რადგან საზოგადოების განვითარების საერთო კანონზომიერებები ქვეყნის კანონმდებლობის მსგავსებაშიც პოულობდა ასახვას, თუმცა სხვადასხვა კულტურას მათში თავისი კორექტოვები შეპქონდა. ეს, უპირველეს ყოვლისა, ითქმის ადათობრივ ნორმებზე, რომლებიც წარმოადგენდნენ ამა თუ იმ გვარში ან თემში დამკაიდრებულ ქცევის საერთო წესს. შემდეგში ადათობრივი ნორმები შეცვალა ადათობრივმა სამართალმა და იგი გამოხატავდა არა მთელი საზოგადოების, არამედ მისი გაბატონებული ნაწილის ინტერესებს. ადათობრივი სამართალი მოქმედებდა კანონთა პარალელურად და იგი კანონმდებლობას უფრო სრულყოფილს ხდიდა. ბევრი ძველი ადათი საკანონმდებლო ძეგლებშიც იქნა გამოყენებული.

კანონმდებლები სარგებლობდნენ მეზობელი ქვეყნების სამართლებრივი ძეგლებით. უძველესმა შუმერულმა და აქადურმა კანონმდებლობამ დიდი გავლენა მოახდინა ბაბილონის მეფის ხამური-

ბის სამართალზე, რომელმაც, თავის მხრივ, ხეთებისა და ებრაელთა სამეფოს კანონმდებლობაზე იქონია გავლენა. როგორც მიუთითებენ, აქადური, შუმერული, ბაბილონური და ასირიული კანონები ადასტურებენ საერთო მესოპოტამურ სამართლის არსებობას III ათასწლეულში ჩვენს წელთაღრიცხვამდე, რადგან ყველა მათი ძირითადი პრინციპი ზოგადი აზრით ერთი და იგივეა. მიგვაჩინია, რომ ამას საზოგადოების განვითარების საერთო პრინციპებიც უწყობდა ხელს, რაც გარკვეულწილად საზოგადოების მიერ სამართლებრივი მოთხოვნების იდენტურობასაც განაპირობებდა და, ამდენად, ერთი ქვეყნის კანონმდებლების მიერ მეორე ქვეყნის კანონების გამოყენების ფართო შესაძლებლობებს ქმნიდა.

ოჯახის მეტად მყარი და ყოველმხრივ ჩამოყალიბებული ინსტიტუტი გვქონდა ძველ საქართველოშიც. ამას ნათლად მოწმობს ჩვენამდე მოღწეული პირველი ლიტერატურული ძეგლი „შუშანიკის წამება“. ნაწარმოებში წარმოდგენილია საოჯახო ცხოვრების ცოცხალი სურათები. მართალია, ქალთა საზოგადოებრივი მდგომარეობა ძალიან შეზღუდულია, მაგრამ, როგორც ვნახეთ, ეს საერთოდ დამახასიათებელია მაშინდელი ცვილიზებული სამყაროსათვის. ქმარი ოჯახის უფროსია და ქალი უფლებრივად მას ემორჩილება.

„შუშანიკის წამების“ მიხედვით ქალს ნება არ პქონდა მამაკაცთან ერთად ეჭამა პური. ამავე დროს ნაწარმოებიდან მაინც არ ჩანს, რომ ქალი მთლიანად ქმრის მონა-მორჩილი იყოს, როგორც ეს ზოგჯერ ჩვენს ლიტერატურულ კრიტიკაშია მიჩნეული. ამ მხრივ ისაა საყურადღებო, რომ შუშანიკი არასოდეს არ უთმობს არაფერს თავის ქმარს და საკმაოდ უხეშად და გამომწვევადაც იქცევა მასთან. გავიხსენოთ თუნდაც ის სცენა, როდესაც შუშანიკმა ქმრის თანდასწრებით სრულიად მოურიდებლად მაზლის ცოლს „ჭიქა... პირსა შეალენა“. ნურც ის დაგვავიწყდება, რომ მისი ღრმა რწმენით, იქ, საიქიოში მოეღება ბოლო მამაკაცისა და ქალის უთანასწორობას, სადაც „არა არს რჩევად მამაკაცისად და დედაკაცისად“. ეს კი იმას ნიშნავს, რომ შუშანიკს გათვითცნობიერებული აქვს ამ უთანასწორობის მთელი არსი, ამ უთანასწორობას ამქვეყნიურ ცხოვრებაშიც ებრძვის და, მაშასადამე, ზოგადად ასეთი ქალი არც ქმრის მონა-მორჩილად შეიძლება გამოვაცხადოთ. ამ მხრივ არანაკლებ მნიშვნელოვანია „ქართლის ცხოვრებაში“ ნათქევამი სიტყვები, რომელიც უფლისაგან მოისმინა ქართველთა განმანათლებელმა ნინო კაბადოკიელმა მცხეთაში წასვლის წინ: „არცა დედაკაცებად არს, არცა მამაკაცებად, არამედ

თქვენ ყოველნი ერთ ხართ“.<sup>5</sup> ეს ამბავი ქრონოლოგიურად IV საუკუნის პირველ მეოთხედში ხდება.

ჩვენი წინაპრები განსაკუთრებულ მნიშვნელობას ანიჭებდნენ ოჯახის სიწმინდეს და ასეთ ოჯახს ერისა და ქვეყნის საფუძვლად მიიჩნევდნენ. ამიტომ არ არის შემთხვევითი, რომ ქალის, როგორც დედის, მეოჯახის, სიწმინდისა და ნამუსის, როგორც სიცოცხლის მუდმივი და განახლებადი წყაროს კულტი აგრძერიგად გამოიკვეთა მთელ ქართულ მწერლობაში. ძველქართულ საერო აპოფთეგმურ ლიტერატურაში შემთხვევით როდია ნათქამი: „ქალისა მზითევი არს სიწმინდე და ნამუსი“. არც ახალგაზრდობისადმი შემდეგი დარიგებაა შემთხვევითი: „ცოლი ღირსი ირჩიე... და მზითვად ბუნება იკითხე მისა“.<sup>6</sup>

ოჯახური ცხოვრების სიწმინდის ასეთი მორალი დამახასიათებელია მთელი ქართული მწერლობისათვის. მაგალითად, თვალსაჩინო სახელმწიფო მოღვაწისა და მწერალ-მწიგნიბრის იოანე ბატონიშვილის „ხუმარსწავლაში“, რომელიც დაწერილია XIX საუკუნის პირველ მესამედში, ვკითხულობთ: „უნდა პირველად შემრთველმან ცოლისამან გამოარჩიოს და გამოიკითხოს პატიოსნობად და აღზრდილობად, სიმშვიდე და გულმართლობად მისი. და ოდეს ცნას ყოველივე ნამდვილად, მაშინ მიიყვანოს იგი შემწედ თვისად, ვინაიდან გამორჩებასა ზედა მისსა არს დამოკიდებულ მომავალი ბედნიერობად მისი და არა კმარა მხოლოდ მშვენიერებისა გამო მიყუანებად ცოლისა თვისისა და შერთვად... ვინაიდგან დღე ყოველ იგი უწესობათა თვისითა აწუხებდეს ქმარსა თვისსა... გამულებს მმათა და სხუათა კეთილსმყოფელთა შენთა... განვალს სახლით თვისით და არა ნიადაგ მყოფს მას შინა, არცა იღწვის სახლის მეურნეობისათვის“... ამავე დროს მამაკაცსაც მართებს ცოლისადმი პატივისცემა და პატიოსნების დაცვა: „ნუ წინა აღუდგები ნებასა მისსა უმიზეზოდ, ვინაიდგან იგი მოზიარე არს შენთანა მწუხარებისა და შექცევისა შენისა. შეცოდებაი მისი განმართე მყუდროებით და ნუ ითხოვ მისგან, ვითომც რომ თანამდებ იყოს იგი პატივისცემად შენისა უთავაზრობისათვის... იყავ სარწმუნო საწოლისა ქორწინებისასა, რამეთუ იგი არს დედა შვილთა შენთა“.<sup>7</sup> ამდენად, ოჯახურ სიწმინდესა და ერთგულებას მეუღლები ყოველთვის უნდა უფრთხილდებოდნენ და იცავდნენ.

ძველ საქართველოში ქალის უფლებრივი მდგომარეობის შეს-

<sup>5</sup> ქართლის ცხოვრება, თბ., 2008, გვ. 99.

<sup>6</sup> სწავლანი და სიბრძნები ფილოსოფოსთანი. თბ., 1969, გვ. 74, 79.

<sup>7</sup> იოანე ბატონიშვილი. ხუმარსწავლა, თბ., წიგნი I, 1990, გვ. 506-507.

ახებ მნიშვნელოვანია ის ფაქტი, რომ საცოლის ყიდვა „სრულიად უცხო იყო ქართული სინამდვილისათვის, თუმც მეზობელ სომხეთში საცოლე იყიდებოდა და ბიზანტიის იმპერატორს იუსტინიანეს საგანგებო ნოველის გამოცემაც კი დასჭირდა სომხეთში ამ ჩვეულების აღმოსაფხვრელად. სომხეთისაგან განსხვავებით, სადაც გასათხოვარი ქალი მემკვიდრეობით უფლებებს მოკლებული იყო და მშობლების ქონებაში წილი არ ედო, საქართველოში ქალს გათხოვებისას მშობლების ოჯახიდან მზითვი მიჰქონდა. მზითვის ინსტიტუტის გაჩენასთან ერთად ოჯახის საერთო ქონებაში ქალის წილი გამოიკვეთა, რასაც მისი მდგომარეობა ქმრის ოჯახში სრულიად შეცვალა“.<sup>8</sup>

1881 წელს აკაკი წერეთული წერდა: „ამ რამდენიმე წილის წინეთ ერთს ქართველ თაგადისშვილს შესწამეს, რომ ცოლსა სცემსო, ჩააგდეს სამართალში და სულ ვაი აძახეს. ბევრი იყვირა დამნაშავემ... მაგრამ არა ეშველა-რა: აუკრუს ბარგი და გაისტუმრეს იქითკენ, სადაც ცოლების ცემა-ტყეპა ცხოვრების კანონია“.<sup>9</sup> ამ მოვლენამ მთელ საქართველოში დიდი ვნებათაღელვა გამოიწვია და იგი საზოგადოების ფართო მსჯელობის საგანი გახდა. ისევ აკაკის თუდავესესხებით, ყველა აღნიშნავდა: „ახია მაგაზედ... შეურაცხყო ქართველობაო! როგორ თუ დედა-კაცს, იმ სათუთსა და სუსტ-ქმნილებას, სცემსო?! ამით ეგ მოელს ქართველობას არცხვენს და სახელს უტეხსო!..“

ზემოთ მოტანილი ფაქტი იმაზე მეტყველებს, რომ მე-19 საუკუნეში საქართველოში ქალის ცემა და, როგორც ჩანს, ოჯახში ძალადობის სხვა ფორმები, საზოგადოების პრობლემა ნაკლებად იყო. უფრო ადრე ადათ-წესები, ჩვეულებები, ტრადიციები მკაცრად განსაზღვრავდა ქალის ადგილს საზოგადოებასა და ოჯახში, მისი როლი და თავისუფლება მნიშვნელოვნად შეზღუდული იყო, თუმცა ქართული სამართალი ქალის უფლებრივი მდგომარეობის შესახებ ბევრად უფრო ლოიალური იყო, ვიდრე მეზობელ და ეპროპის ქვეყნებში. მაშინ, როდესაც ევროპაში მე-16 საუკუნეში კუდიანების დევნამ აპოგეას მიაღწია და ზოგიერთი გაანგარიშებით მილიონზე მეტი „კუდიანი“ სიცოცხლეს საშინელი წამებით გამოასალმეს და, ამასთან, მსხვერპლთა 85 პროცენტს ქალები შეადგენდნენ, საქართველოში არც ერთი ქალი სიკვდილით არ დაუსჯიათ და ამას არც სამართალი ითვალისწინებდა. ამასთან, საზოგადოების განვითა-

<sup>8</sup> საქართველოს ისტორია, ტ. I, თბ., 2006, გვ. 335.

<sup>9</sup> ა. წერულელი. თხზულებათ სრული კრებული, თხუთმეტ ტომად, ტ. XII, თბ., 1960, გვ. 30.

რების სხევადასხევა პერიოდში საბერძნეთში, სომხეთსა და სხვა ქვეყანაში ქმარს შეეძლო მოეკლა ცოლი, შვილიც კი და იგი ამისთვის პასუხს არ აგებდა. სომხეთში ახალი წელთაღრიცხვის მეორე საუკუნეში პატრიარქალური ოჯახის უფროსს ოჯახური კოლექტივის წევრების მიმართ სიკვდილ-სიცოცხლის უფლება გააჩნდა. ოჯახის უფროსს, მამაკაცს, შეეძლო ცოლის, შვილისა და უშვილო ძმის ან დის მოკვლაც კი. ამის შესახებ მოგვითხრობს სირიელი გნოსტიკოსი — ვარდესანი.<sup>10</sup> ქალის მდგომარეობა იმდენად დაკნინებული ჩანს, რომ სანკრისტში ქალისა და საქონლის აღმნიშვნელი სიტყვა ერთი და იგივეა — დარაგავამ.<sup>11</sup> ზემოთ აღნიშნულის მსგავსი ქართულ ენასა და ქართულ ლიტერატურულ და სამართლებრივ ძეგლებში არაფერი გეხვდება. ქართული ფეოდალური სამართლის ძეგლების მიხედვით ქალის პატივი და ღირსება თუ უფრო მეტად არა, არანაკლებ დაცულია, ვიდრე თუნდაც რუსეთსა და ვეროპის ქვეყნებში, მიუხედავად იმისა, რომ ფეოდალიზმის არსებობის მოელი ისტორიის განმავლობაში ეს საკითხი უშუალოდ უკავშირდება ადამიანის წოდებრივ კუთვნილებას, როდესაც წოდებრივი კუთვნილების იერარქიის შესაბამისად საზოგადოებისა და სახელმწიფოსაგან მინიჭებული პატივი და ღირსებაც მატულობდა. მიუხედავად ამისა, რიგ შემთხვევაში ქალის ღირსებისა და პატივის დასაცავად ქართული სამართალი წოდებრივ კუთვნილებას მხედველობაში თითქმის არ იღებს. ბატონიშვილი ვახტანგის სამართალში აღნიშნულია: „თუ ბატონმა ყმის ცოლს უაშიყოს, ან დამით და ან დღისით, და ცოლთან საწოლად დაახელოს, და მან კაცმან მოკლას, დიდი იყოს თუ მცირე, სისხლი არ გაუჩნდების“,<sup>12</sup> ე. ი. ფაქტობრივად პასუხს არ აგებსო. სამართლის ნორმებით იკრძალებოდა ადამიანის სიტყვიერი შეურაცხოფაც — გინება, ლანძღვა და ა. შ.

ბექა მანდატურთუხუცესის სამართალი, რომელიც შედგენილია XIII საუკუნის ბოლოს ან XIV საუკუნის დამდეგს, იცავს ქალის ღირსებას. ბექას სამართლის 23-ე მუხლის თანახმად, თუ ცოლ-შვილიანმა კაცმა ქმარ-შვილიანი ქალი შეარცხვინოს და პატივიც ახადოს ნებით თუ უნებურად და გამეღავნდეს, ცოლის ქმარს სრული სისხლის საფასური უნდა გადაუხადოს, ხოლო მთავარმა და პა-

<sup>10</sup> გ. ნადარეიშვილი. ადამიანის პატივსა და ღირსების დაცვა ქართველი ფეოდალური სამართლის ძეგლებისა და სასამართლო პრაქტიკის მასალების მიხედვით. ქართული სამართლის ისტორიის საკითხები, ალმანახი, 14, თბ., 2000, გვ. 54.

<sup>11</sup> ძველი აღმოსავლეთის ხალხთა ისტორია. თბ., 1971, გვ. 573.

<sup>12</sup> ქართული სამართლის ძეგლები, ტ. I, თბ., 1963, გვ. 493.

ტრონმა ეს კაცი ნიფშვის ამარა და ყელზე თოქმობმული უბანში უნდა ჩამოატაროს. აღსანიშნავია, რომ ქართული სამართალი ქალის მიმართ ბევრად უფრო ლმობიერია იმ შემთხვევაშიც კი, თუ მრუშობა ქალის ნებით მოხდა. კანონმდებლობა ცოლშვილიან კაცს მეტ პასუხისმგებლობას აკისრებს ქმარშვილიან ქალთან შედარებით. ცნობილია, რომ შუა საუკუნეებში ვეროპის ზოგიერთ ქვეყანაში მრუშ ქალს სრულიად გააშიშვლებდნენ და აიძულებდნენ მრუშობაში თანამონაწილე შიშველი მამაკაცი სასქესო ორგანოზე თოკმობული ქუჩაში ჩამოტარებინა. მაგალითად, ასეთი სასჯელი დაუწესებია ლუი IX-ს (XIII საუკუნე) მრუში ქალისა და მრუშობაში თანამონაწილე რაინდისთვის. იგივე ჩვეულება ცნობილი იყო დანიის ქალაქებში XIII-XV საუკუნეებში.<sup>13</sup> კიდევ კარგი, რომ ეს ჩვეულება ისტორიას ჩაბარდა, თორებ თბილისის ქუჩები აივებოდა შიშველი მამაკაცების სასქესო ორგანოზე თოკმობმული ასევე შიშველი ქალებით, განსაკუთრებით „რუსთავი 2“-ის, „იმედის“, „მაქსტროს“, „ტაბულასა“ და მათი მსგავსი სხვა ტელევიზიების საეჭვო რეპუტაციის მქონე უურნალისტი გოგო-ბიჭების საკმაო ნაწილითა და მათი სტუმრებით, რომლებმაც თავზე წამოიცვეს საქართველოს ზნეობა.

ფეოდალურ საქართველოში სამართლის ნორმების მეშვეობით იკრძალებოდა ქალის შეურაცხყოფა, ქალზე ფიზიკური ძალადობა, მისი ლანძღვა და გინება. ვახტანგ ბატონიშვილის სამართლის 64-ე მუხლი სწორედ ამ ფაქტებზე ამახვილებს ყურადღებას: „კაცი რომ ცოლს სტანჯვილეს და უპატიურად ეპყრობოდეს, და ურიგოს უშურებოდეს, მეფემ ის კაცი დააბას, დატუქსოს, ავად მოეპყრას. და კათლიკოზმაც ასრე იყოს“.<sup>14</sup> სამაგიეროდ, „თუ ცოლმან ქმარს ან სცეს, ან დაჭრას, დიდი გვემა და ტანჯვა უყოს კათალიკოზმან“.<sup>15</sup> საერთოდ, „დიაცის გინებისათვის“ მკაცრი სასჯელი იყო დაწესებული.

ფეოდალური ურთიერთობების ეპოქისათვის, ვფიქრობთ, მეტის-მეტად ლიბერალურად ჩანს ქალის მრუშობისათვის დაწესებული ქართული სამართლებრივი ნორმები. ამ შემთხვევაშიც კი კანონმდებელი ცდილობს ქალის ღირსება და პატივი არ შელახოს. ასეთი სამართლებრივი ნორმების მქონე ქვეყანაში ძნელია, ვისაუბროთ ქალების მიმართ რაიმე მასობრივ ძალადობაზე. ამ მხრივ მეტად საგულისხმოა ვახტანგ ბატონიშვილის სამართლის 67-ე მუხლი: ქმარს, „თუ ქალს ბოზობა შეემთხვიოს, თუ უნდა, გაუშეებს, რომე არცარა

<sup>13</sup> გ. ნადარეშვილი. დასახ. ნაშრომი, გვ. 127.

<sup>14</sup> ქართული სამართლის მეცნიერები, ტ. I, თბ., 1963, გვ. 498.

<sup>15</sup> იქვე, გვ. 499.

ამ სოფელს ეკითხვის და არცარა იმ სოფელსა; და თუ უნდა, არ გაუშევებს, ორივე კაცის ხელით არის. მაგრამ, თუ გაუშვა, რაც მხ-ითევი მოპყოლია, ისიცა და ბოზობით შექმნილი შვილიცა თან უნდა გაატანოს.

მაგრამ, თუ ამ მართალს ქმართან შვილი ჰყავს, ზითევი მთლაც არ მიეცემის, ამიტომ რომ შვილსაც წილი აქვს, ნახევარი ანუ უმ-ცროსი; ან არა, რამდენიც შვილი ყუანდეს, შვილებსა და დედას თვითო-თვითო წილად მისცენ ყველას სწორედ.

რომელიც ზითევი ავის ქამდის თვითონ დაუხარჯავს თავისის ნებით, იმას ვეღარ ითხოვს“.<sup>16</sup>

ვახტანგ ბატონიშვილის სამართალი ასევე, შეიძლება ითქ- ვას, უზადოს სამართლებრივი ნორმების მოწესრიგების თვალსაზ- რისით იმ შემთხვევაში, როდესაც მამაკაცისა და ქალის ოჯახური თანაცხოვრების პირობებში ოჯახს შვილი არ უჩნდება ან კიდევ კაცი ცვედანი ამოჩნდება. ვახტანგის სამართლის 67-ე მუხლის მიხედ- ვით, „უშვილობისათვის კაცი ძალად და მის უნებურად ცოლს ვერ დააგდებს, და თუ დააგდებს, სრული სისხლი უნდა მისცეს.“

იქნების კაცი ასრე ჭანი (კაცი, რომელსაც შვილის შექმნა არ შეუძლია — ა. თ.) იყოს, რომე ცოლთან წოლა კი შეეძლოს და შვი- ლის შექნა კი არ შეეძლოს, ამისთვინაც არ გაიყრებიან. და თუ სულ ასრე მცვედანი არის, რომ ქალთან წოლა არ შეუძლია, უნდა კაცმან ცოლს დასტური მისცეს სხვის ქმრის შერთვისა.

თუ, ვინ იცის, ქორწილზედ კაცი ყოფილა, და ან ქორწილის უწინაც, და მერმე ქორწილზედ დამცვედნებულა, არ გაიყრებიან“.<sup>17</sup>

მოტანილი სამართლებრივი ნორმა მეტი სიცხადისათვის კომენ- ტარს საჭიროებს. დანაშაულისათვის სასჯელად ძირითადად სისხ- ლის სხვადასხვა რაოდენობით გადახდა იყო დაწესებული. ჩვენს შემთხვევაში თუ კაცი ქალს გაშორდებოდა (უბრალოდ დააგდებდა) ქალისათვის სრული სისხლი უნდა გადაეხადა. ამდენად სისხლის ფასში აისახებოდა ადამიანის პატივი და ლირსება. სისხლის ფასი ან სამართლის წიგნში ან სათანადო სიგელში იყო დაფიქსირებული. რო- გორც პროფესორი გიორგი ნადარეიშვილი განმარტავს, ეს პატივი და ლირსება მით უფრო მაღალი იყო, რაც უფრო დიდი „სისხლი სდიო- და“ ამა თუ იმ ფეოდალური საგვარეულოს წარმომადგენელს. „სისხ- ლის ფასზე“ გავლენას ახდენდა ქონება, თანამდებობა, მოყვარულ-

<sup>16</sup> ქართული სამართლის ძვლები, ტ. I, თბ., 1963, გვ. 499.

<sup>17</sup> იქვე, გვ. 523.

ნათესაური კავშირები და სხვ. ვახტანგ ბატონიშვილის სამართლის (შედგენილია XVIII საუკუნის პირველ ნახევარში) ზემოთ აღნიშნულ მუხლში ცოლის უბრალო დაგდებაზე ბევრად უფრო მკაცრი სასჯელია გათვალისწინებული („სრული სისხლის მიცემა“), ვიდრე გაცილებით ადრე შედგენილი ბექა მანდატუროუსუცესისა (XIII საუკუნის დასასრული — XIV საუკუნის დასწერისი) და გიორგი ბრწყინვალის (1335 წელი) სამართლის ძეგლებში, რომლებშიდაც ცოლის უბრალოდ დაგდებისათვის სისხლის ნახევრის გადახდაა დადგენილი. კანონმდებლები ქალის პატივისა და ღირსების დაცვისათვის სულ უფრო ლიბერალურ სამართლის ნორმებს აწესებდნენ.

ზემოთ მოტანილი ფაქტების ანალიზის შედეგად, რა თქმა უნდა, ისეთი დასკვნა არ შეიძლება გამოყიტანოთ, რომ გენდერული თანასწორობა საქართველოში იდეალური იყო. ქალის უფლებრივი მდგრამარეობა, მამაკაცებთან შედარებით, დამცირებულად განიხილებოდა და საზოგადოებრივი შეგნება ჯერ კიდევ არ იყო შზად თამამად ემსჯელა ამ მეტად მტკიცნეულ პრობლემაზე. მიუხედავად ამისა, ვერ ვიტყვით, რომ საქართველოში ქალი ქმრის მონა-მორჩილი, მისი ყოველგვარი სურვილის უსიტყვო აღმსრულებელი იყო. სამართლებრივი ნორმების გარდა, ამის თქმის უფლებას გვაძლევს ჰავიოგრაფიული და საერო ლიტერატურა, იტალიელი მისიონერებისა და ევროპელი მოგზაურების ნაშრომები. მაგალითად, ფრანგი კონსული გამბა, რომელმაც 1820-იან წლებში იმოგზაურა საქართველოში, აღნიშნავს: „ჩვენი მასპინძლის გვარი იყო ჯორჯიკია. მან თავისი მეუღლე წარმოგვიდგინა — მაღალი, ტანწერწეტა და მეტად მშვენიერი ქალი... ოცდაექვსი წლისა ძლივს იქნებოდა... იგი ძალზე თავაზიანად მოვცესალმა და მთელი იმ ხნის განმავლობაში, რაც მათთან დავრჩით, თამამად ეჭირა თავი, რამაც მეტისმეტად გაგვაოცა“.<sup>18</sup> ასეთივე აზრისაა ქართველი ქალების შესახებ იტალიელი მისიონერი კასტელი და სხვ. რუსთაველმა კი დაგვიხატა „უთვალავი ფერით“ შემკული მშვენიერი სამყარო, სადაც ქალი ყოველმხრივ სრულყოფილ ადამიანად არის მიჩნეული, რაც უპრეცედენტო შემთხვევა იყო შეუა საუკუნეების ისტორიაში.

მიუხედავად ყველაფრისა, ამჟამად, ერთხელ კიდევ, არასამთავრობო ორგანიზაციებმა, „რუსთავე 2“-მა და მისმა მსგავსმა ტელევიზიიებმა ერთი ამბავი ატეხეს — საქართველოში ქალთა მიმართ ძალადობა მძვინვარებს, სამართალდამცავი ორგანოები კი ამ მძიმე

<sup>18</sup> ჟაკ ფრანსუა გამბა. მოგზაურობა ამიერკავკასიაში. თბ., 1987. გვ. 120.

პრობლემის მოსაგვარუბლად არაფერს აკეთებენო. ისინი განსაკუთრებით ტრაგიკული შემთხვევების შემდეგ აქტიურდებიან. რაძენიმე თვის წინათ ყოფილმა ქმარმა ილიას უნივერსიტეტში ლექტორ მეუღლეს მიაკითხა, ლექციიდან გამოიყანა, იქვე იარაღის გასროლით მოკლა და თვითონაც თავი მოიკლა. ახლახან კიდევ თულავში შემზარები ფაქტი მოხდა: მამაკაცმა ქალი სასიკვდილოდ დაჭრა, ხოლო შემდეგ თავი მოიკლა. ორივე შემთხვევაში ფსიქიკურ დარღვევასთან გვაქვს საქმე და სამართალდამცავი ორგანოები არაფერ შუაშია. არასამთავრობო ორგანიზაციები და მათი ხელმძღვანელები, განსაკუთრებით ეკა გიგაური, ნინო ლომჯარია და კახა კოჟორიძე, როდესაც მძიმე ეროვნული პრობლემებია გადასწყვეტი, ხმას არ იღებენ, ასეთ შემთხვევაში კი კაკანს მოჰყვებიან და ყველაფერს მთავრობას აბრალებენ. და როდესაც ჩვენ ჯიუტად ვნერგავთ გენდერული სრული თანასწორობის იდეას, იმაზეც უნდა დავფიქრდეთ, ეს ყველაფერი ოჯახის კრიზისს ხომ არ გამოიწვევს, რომლის ნიშნები თანამედროვე განვითარებულ საზოგადოებაში სულ უფრო აშკარად იკვეთება. ბუნებამ ქალს სიცოცხლის გაგრძელების ყველაზე დიდი მისია დააკისრა. ბავშვის დაბადება, „ბუნების უმშვენიერესი აქტი“, როგორც მას ოსი ხალხის დიდმა შვილმა კოსტა ხეთაგუროვმა უწოდა, არსთა გამრიგემ ქალს დააკისრა და ჩვილის მოვლის პრიორიტეტიც მასვე არგუნა წილად. გოეთეს სიტყვები — „მარად ქალური გვიზიდავს ჩვენ“, — სულაც არ ნიშნავს ქალის მთავარ დანიშნულებასა და ფუნქციებში უცერემონიოდ შეჭრას. ჩვენს წინაპრებს ოჯახი ერის, ქვეყნის ბურჯად, ხოლო ქალები ჩვენი ცხოვრების ჭახრაკებად, ეროვნული სულიერი ცხოვრების დამცველებად, ახალგაზრდების ეროვნული სულისკვეთებით აღზრდის მთავარ ძალად მიაჩნდათ და მათდამი უდიდეს პატივისცემას გამოხატავდნენ, მაგრამ ამავდროულად ისინი არც ასე უთავბოლო გენდერული თანასწორობის მომხრენი იყვნენ.

ცხოვრება ისე როდია მოწყობილი, რომ მეუღლეთა შესაძლებლობები იდეალურად დაემთხვეს ერთმანეთს. ბუნებამ მეტი შესაძლებლობები მამაკაცებს უბოძა და ისიც უნდა შევძლოთ, რომ ამ უპირატესობებისადმი პატივისცემა ვისწავლოთ, უპირველესად ოჯახში, რათა ოჯახური ცხოვრების პარმონია დისპარმონიად არ გადაგვექცეს. უფალმა ღმერთმა ამ ცხოვრებაში ქალსა და მამაკაცს თავ-თავისი როლი დააკისრა და ნუ ვეცდებით ამ როლების შესრულებაში ხელოვნურად ჩარევას. თვის დროზე ცნობილი რუსი

მეცნიერი ივანე მიჩურინი ამბობდა: ჩვემ არ უნდა დაგელოდოთ წყალობას ბუნებისაგან, ჩვენ უნდა წაროთვათ იგი მას. ამ წარომევამ რა შედეგიც მოიტანა, არაერთხელ დავინახეთ და ვიგემეთ.

მამაკაცისა და ქალის შრომას შორის დიდი განსხვავებაა. მამაკაცის ფსიქიკა ისეა მოყწობილი, რომ იგი უფრო მეტად შემოქმედებითი შრომისათვის არის მოწოდებული, ხოლო ქალი მონოტონურ შრომასაც სიამოვნებით ასრულებს. მამაკაცისა და ქალის დამოკიდებულება სხვადასხვა სხვადასხვა შრომისადმი. ხშირად მკვეთრად გამიჯნულია პროფესიები სქესის მიხედვით. ვერსად ნახავთ კონვეირზე მომუშავე მამაკაცს, სადაც შრომა ერთფეროვანია და მონოტონური. საბავშვო ბაგა-ბაღშიც მხოლოდ ქალებია დასაქმებული, მედიცინის დებადაც მხოლოდ ქალები მუშაობენ, მაგრამ სამაგიეროდ ვერსად ნახავთ ტელევიზორის, სხვადასხვა ტექნიკის შეკეთებაზე დასაქმებულ ქალს, თუმცა ეს სამუშაოები კარგად ანაზღაურებადია და არც მაინცდამაინც მძიმე. ქირურგების დიდი უძრავლესობაც მამაკაცები არიან და ა. შ.

ამასთან, არსებობს სხვადასხვა პროფესია, სხვადასხვა ხასიათის შრომა, რომელებიც მოითხოვენ დიდ ფიზიკურ ძალას და ამტანობას. ასეთ პროფესიებს, როგორც წესი, მხოლოდ მამაკაცები ეუფლებიან, მძიმე ფიზიკურ შრომასაც მამაკაცები ასრულებენ. სამაგიეროდ, შედარებით მონოტონური, მაგალითად, ოპერატორის და მოლარის, შრომა, რომელსაც განსაკუთრებით ფართოდ იყენებენ საბანკო სექტორში, ასე ვთქვათ, ქალების მიერაა დაჯაჭვნული. ისტორიულად ქსოვაც მხოლოდ ქალების საქმე იყო. შემთხვევით არ უთქვამს დიდ რუსთაველს: „კაცი ჯაბანი რითა სჯობს დიაცსა ქსლისა მბეჭდელსა“. ასეთი მაგალითების მოყვანა შორს წაგვიყვანს, მაგრამ ის კი უნდა აღვნიშნოთ, რომ მამაკაცი ბუნების მიერ უფრო შემოქმედებითი, ახლის ძიების უნარით არის დაჯილდოებული. მსოფლიოში ცნობილი კონსტრუქტორები, რომლებმაც გადატრიალება მოახდინეს ტექნიკაში, მამაკაცებია. აქ იმის აღნიშვნაც ღირს, რომ მოაზროვნე ადამიანის ფორმირებიდან მოყოლებული, რაც სულიერი ცხოვრების საგანძური შეიქმნა, მამაკაცის ჭკუისა და გონების ნაყოფია. დიდი ტექნიკური მიღწევები, კაცობრიობის მიერ საყოველთაოდ აღიარებული ლიტერატურის, მუსიკის, მხატვრობის ნაწარმოებები, ხუროთმოძღვრების ძეგლები, უკლებლივ მამაკაცების შექმნილია, მათი დამსახურებაა და იქ უშუალოდ ქალის ხელი საერთოდ არ ურევია, თუმცა ქალის თანადგომის, მათი როგორც შთაგონების წყ-

აროს გარეშეც, ღირებული არაფერი შექმნილა.

რაც ზემოთ აღვნიშნეთ, ამით სულაც არ გვინდა იმის თქმა, რომ გენდერული თანასწორობის მომხრე არ ვიყოთ, სქესთა თანასწორუ-ფლებიანობას პატივს არ ვცემდეთ. ჩვენ მიგვაჩნია, რომ თანასწორო-ბა ყოველდღიური სადილის დამზადებაზე, ჭურჭლის რეცხვაზე, სახლის დალაგებაზე, პროდუქტების ყიდვაზე, ჩვილისათვის პამ-პერსის გამოცვლაზე არ უნდა დავიყვანოთ. განათლებული საზოგა-დოება ამ სფეროში მეუღლეთა ურთიერთობას ხმაურის გარეშეც მიაღწევს. ის რომ, მაგალითად, გამოკვლევის შედეგად საფრანგეთ-თან შედარებით საქართველოში კვლავ ბევრია ისეთი ოჯახი, სადაც მეტ-ნაკლებად შენარჩუნებულია ტრადიციული გენდერული ურთ-იერთობები ყოველდღიურ ოჯახურ ცხოვრებაში (საქართველოში ყოველ მეხუთე შინამეურნეობაში მამაკაცი დომინირებს საოჯახო საკითხებზე გადაწყვეტილების მიღების პროცესში, მაშინ, როდესაც საფრანგეთში ასეთი ოჯახების წილი არ აღემატება 7 პროცენტს<sup>19</sup>), ამით ქვეყანა არ იქცევა. აქ, ალბათ, ღირს გავიხსენოთ ძველი სა-ბერძნეთის ფილოსოფოს-მორალისტის, ისტორიკოსის პლუტარქეს მიერ დაწერილი სპარტელი კანონმდებლის ლიკურგეს ბიოგრაფი-იდან ერთი ადგილი: „ერთი კაცი ლიკურგეს ურჩევდა, სპარტაში დემოკრატია დაამყარეო“. ლიკურგემ ამ კაცს უპასუხა: „ჯერ შენ სცადე, შენს ოჯახში დაამყარო დემოკრატიაო“.<sup>20</sup> თუ საოჯახო საკითხების გადაწყვეტაში უმეტესად მამაკაცი დომინირებს, მით უმეტეს მეუღლეთა შორის ასაკობრივი სხვაობისა და განათლების დონის პირობებში (როდესაც მამაკაცი მეუღლეზე ასაკით შესამჩნე-ვად უფროსია და განათლების დონით მაღალი), ეს ოჯახის ნორმ-ალური ფორმირების, განვითარებისა და საზოგადოებისათვისაც უკეთესია.

ჩვენ დავახასიათეთ და გავაანალიზეთ ქალებზე მეუღლის მხრი-დან განხორციელებული ძალადობის ფაქტები. მაგრამ ძალადობას მამაკაცებიც განიცდიან ქალების მხრიდან და ამის მომსწრენიც ვართ ყოველდღიურ ცხოვრებაში, თუმცა ამ პრობლემას არავინ იკვლევს. ჩვენ მიერ ზემოთ აღნიშნულ გამოკვლევებში მამაკაცებზე ძალადობის ფაქტებს გვერდი აქვს ავლილი, არადა შეიძლება ზო-გიერთი ძალადობის სახეობა, კერძოდ, ფსიქოლოგიური ძალადო-ბა, რომელიც მოიცავს ლანბლგა-გინებას, მუქარას, ფსიქოლოგიურ

<sup>19</sup> ოჯახური ურთიერთობები და თაობათა ურთიერთდამოკიდებულება საქართველოში, თბ., 2010, გვ. 28.

<sup>20</sup> პლუტარქე. რჩეული პარალელური ბიოგრაფიები, ტ. I, თბ., 1957, გვ. 33.

დაშინებას და ფიზიკური ანგარიშსწორების მიმანიშნებელ უქსტი-კულაციას, არანაკლებ გავრცელებული იყოს. ეს განსაკუთრებით შექება ბოლო წლებს, როდესაც ბევრი ოჯახი სიღუბჭირეში ცხოვ-რობს და, ამასთან, ოჯახში ძირითადი შემომტანი ქალი გახდა, რომელსაც ქანგამცლელი შრომა უხდება დილიდან საღამომდე. ამასთან, ტელევიზიის არხები ხშირად აჩვენებენ ისეთ ფილმებსა და პროგრამებს, რომელშიც ქალები წევიან აღვირახსნილ ცხოვრებას და ქმრებისა თუ პარტნიორების მიმართ არავითარ უშვერ გინებასა და ლანძღვას არ ერიდებიან ფიზიკური ძალადობის ჩათვლითაც კი. ზოგჯერ ოჯახში ქალის დაბალი განათლების დონეც საკმარისია ასეთი სცენების მოსაწყობად, კერძოდ, მაშინ როდესაც, ვაჟა-ფშავე-ლას თქმისა არ იყოს, „დიაცს ჭკვა ენაზე აკრაგს, ფიქრი თმებშია წასული“.

უკანასკნელ წანს ბეჭდვითი და განსაკუთრებით ელექტრონული მედიასაშუალებები ერთხმად აღნიშნავენ საქართველოში გენდერ-ული უთანასწორობისა და საერთოდ ქალების მიმართ გაზრდილი ძალადობის შესახებ. განსაკურებით ამ მიმართულებით, როგორც აღნიშნეთ, აქტიურობენ არასამთარობო ორგანიზაციები, რაღაც თუ მათ პრობლემა მწვავედ არ წარმოაჩინეს, ისე არასამთავრობო ორგანიზაციებს არავინ დააფინანსებს. ამის შედეგად ჩვენ გვიქმნიან არასწორ, ხშირად მეტად უაღრესად მძიმე წარმოდგენას ქვეყანაში ქალების მდგომარეობის შესახებ — თითქოს მსოფლიოში ქალების მდგომარეობა ჩვენთან ყველა ქვეყანაზე წარმოუდგენლად მძიმე იყოს. ამ საკითხში ძნელია, არ დავეთანხმოთ ბატონ ლევან ვასაძეს: „ოჯახური ძალადობის თემატიკის პედალირება არასამთავრობისა და მედიის მიერ არის წინაპირობა იმისათვის, რომ გააძლიერონ ფაშისტური იუვენალური იუსტიცია და სოცსამსახურის როლი და დაასუსტონ ოჯახები. ოჯახური ძალადობა ხდება, მაგრამ მისი პედალირება და პროპაგანდის როლში აყვანა და ამის შედეგად სოც-მუშაქების როლის გაძლიერება, არის ძალიან ცბიერი საერთაშორი-სო პროგრამის ნაწილი“.<sup>21</sup> აღსანიშნავია, რომ ჩვენთან ჩატარებული ფუნდამენტური გამოკვლევები არასამთავრობო ორგანიზაციების მიერ ჯიტუად განხრას დაჩემებული მოსაზრებების საწინააღმდეგო ვითარებას გვიჩვენებს. კერძოდ, 2006 წელს მოსახლეობის კვლე-ვის ეროვნულმა ცენტრმა საფრანგეთის დემოგრაფიული კვლევის ეროვნული ინსტიტუტის და გაეროს მოსახლეობის ფონდის საქა-

<sup>21</sup> გაზ. „ასაგალ-დასაგალი“, #8, 2015.

რთველოს ოფისის მხარდაჭერით ჩატარა გამოკვლევის „ოჯახური ურთიერთობები და თაობათა ურთიერთდამოკიდებულება“ პირველი ტალღა. საქართველოს ყველა ადმინისტრაციულ რეგიონში გამოკითხულ იქნა 18-79 წლის ათი ათასი რესპონდენტი, მათ შორის 4405 მამაკაცი და 5595 ქალი. 2009 წელს ჩატარდა გამოკვლევის მეორე ტალღა. 2006 წელს გამოკითხული ათი ათასი რესპონდენტიდან მოიძებნა და განმეორებით გამოიკითხა 8303 რესპონდენტი. ეს იმას ნიშნავს, რომ გამოკვლევა პანელური ხასიათის იყო — მსგავსი პროგრამით გამოიკითხა ერთი და იგივე რესპონდენტები.

გამოკვლევის შედეგების მიხედვით ვერ ვიტყვით, რომ საქართველოში გენდერული თანასწორობის მხრივ კატასტროფული ან რამდენადმე მძიმე ვითარებაა, როგორც ეს სურა წარმოაჩინონ ნაციონალური მოძრაობის ლიდერებმა, მათი ჯიბის ტელევიზიებმა და ნაციონალების მხარდამჭერმა არასამთავრობო ორგანიზაციებმა, რომელთა მიზანია არევ-დარევა გამოიწვიონ და გაურკვევლობა დაუკინონობაში.

ოჯახში გენდერული თანასწორობის მნიშვნელოვანი მახასიათებელია მამაკაცისა და ქალის თანაბარი მონაწილეობა ბიუჯეტის მართვაში. აღნიშვნული გამოკვლევის მიხედვით, თანაბარი უფლებებით სარგებლობენ საქართველოში ნახევარზე მეტ ოჯახში მეუღლები ოჯახის ბიუჯეტის ხარჯვაში, თუმცა ქვეყნის ყოველი მეურული ოჯახში მთელ ფულად შემოსავალს ქმარი განაგებს.

გენდერული თანასწორობის ხასიათს შესამჩნევად განსაზღვრავს, აგრეთვე, საოჯახო საკითხებში მამაკაცისა და ქალის მონაწილეობა. ამ შემთხვევაშიც ვერ ვიტყვით, რომ გენდერული უთანასწორობის პრობლემები შესამჩნევად იჩენს თავს განსაკუთრებით საოჯახო საყიდლების, ბავშვების აღზრდისა და თავისუფალი დროის გატარების სფეროებში. მაგალითად, საოჯახო საკითხებზე გადაწყვეტილების მიღების პროცესში, გამოკითხულ რესპონდენტთა 36,4 პროცენტის აზრით, ქალებსა და მამაკაცებს შორის სრული თანასწორუფლებიანობაა, ანალოგიური გამოკვლევის მიხედვით, საფრანგეთში იგივე მდგომარეობაა (36,6 პროცენტი). ამასთან საქართველოში ოჯახში გადაწყვეტილებების მიღებისას დომინირებს ქალები — 41,3 პროცენტი, ხოლო საფრანგეთში — 56,0 პროცენტი, მამაკაცების დომინირება საოჯახო საკითხებზე გადაწყვეტილების მიღების პროცესში შესაბამისად 22,3 და 7,4 პროცენტით გამოიხატება.<sup>22</sup> ამრიგად, <sup>22</sup> ოჯახური ურთიერთობები და თაობათა ურთიერთდამოკიდებულება საქართველოში თბ. 2010, გვ. 6, 27.

გამოკვლევის მიხედვით, „გადაწყვეტილების მიღების პროცესში ქალის როლის თვალსაზრისით საქართველო დიდად არ ჩამორჩება საფრანგეთს. ორივე ქვეყანაში ყველაზე მეტად არის გავრცელებული ისეთი ოჯახები, სადაც ქალი დომინირებს საოჯახო საკითხებზე გადაწყვეტილების მიღების პროცესში, ან პარტნიორები ერთობლივად იღებენ გადაწყვეტილებას ყველა საოჯახო საკითხზე“.<sup>23</sup>

საქართველოსა და საფრანგეთში შედარებით საგრძნობია განსხვავება საოჯახო საქმიანობის შესრულებაში ქალისა და მამაკაცის მონაწილეობის მიხედვით. კურძოდ, საქართველოში ყოველდღიურ სადილს ამზადებს გამოკითხულ რესპონდენტ ქალთა 97,9 პროცენტი, ჭურჭელს რეცხავს 98,7 პროცენტი, ხოლო სახლს ალაგებს 98,0 პროცენტი. ანალიგიური მაჩვენებლები საფრანგეთში შესაბამისად 71,0; 43,0 და 54,0 პროცენტს უდრის. სამაგიეროდ, საქართველოში პროდუქტებს ყიდულობს ქალების 43,4 პროცენტი, საფრანგეთში — 53,0 პროცენტი, გადასახადებს იხდის საქართველოში ქალების 22,5 პროცენტი, საფრანგეთში — 45,0 პროცენტი, ოჯახის გართობა-დასვენებას ორგანიზაციას უკეთებს საქართველოში ქალების 13,4 პროცენტი და საფრანგეთში — 27,0 პროცენტი.<sup>24</sup> მიუხედავად ამისა, არა გვგონია ზემოთ აღნიშნული უთანასწორობები დიდ ცოდვად ითვლებოდეს საქართველოსა და საფრანგეთში.

გენდერული თანასწორობის ხარისხშე მნიშვნელოვან გავლენას ახდენს მეუღლეთა და, ან როგორც ამჟამად ამბობენ, პარტნიორთა (რაც ოჯახის კრიზისის მომასწავებელია) შორის ასაკობრივი განსხვავება. როდესაც მამაკაცი გაცილებით უფროსია ქალზე, მაშინ იგი უფრო ხშირად ერთპიროვნულად წყვეტს საოჯახო ბიუჯეტის მართვის საკითხებს და იღებს ოჯახის ყოველდღიურ საკითხებზე გადაწყვეტილებებს, რაც, ჩვენი აზრით, სრულიად ბუნებრივი და მართულია. ცხოვრებისეული გამოცდილება უფრო სწორი გადაწყვეტილებების მიღების საშუალებას იძლევა. ასეთ შემთხვევაში არ შეიძლება გენდერულ უთანასწორობაზე ვისაუბროთ. აქ იქნებ მოლიერის სიტყვების გახსენებაც ღირდეს: „ქალებს ძალიან უყვართ, როცა მათ ბევრს ახარჯავენ“. მეუღლეთა სხვადასხვა განათლების დონის პირობებშიც შეიძლება იგივე ითქვას. ასე რომ, გენდერული უთანასწორობა ზოგიერთ შემთხვევაში უფრო მისაღებიც არის. ამდენად, ყოველთვის როდია მოსახერხებელი და მისაღები

<sup>23</sup> ოქმ, გვ. 27.

<sup>24</sup> ოქმ, გვ. 31,33.

სრული გენდერული თანასწორობა. ასეთი სხვა ფაქტებიც საკმაოდ არსებობს. მეუღლებსა და საერთოდ, ოჯახის წევრებს შორის განათლების დონისა და ინტელექტის საგრძნობი განსხვავების პირობებში გენდერული თანასწორუფლებიანობაზე, საოჯახო საქმიანობის შესრულებაში ქალისა და მამაკაცის თანაბრად მონაწილეობაზე შეიძლება აბსურდამდეც მიგვიყვანოს. მტკიცება არ სჭირდება იმ ფაქტს, რომ, როდესაც ქმარი საკმაოდ უფროსია ცოლზე, რაც არც ისე იშვიათი მოვლენაა, ოჯახური შრომის მთელი სიმძიმე ქალს აწვება კისერზე.

ქალთა ძალადობაზე დაბალი მაჩვენებლები გამოავლინა ქალთა რეპროდუქციული ჯანმრთელობის ფუნდამენტურმა კვლევამ, რომელიც ჩატარდა საქართველოში 2010 წლს 15-44 წლის ასაკობრივი ჯგუფის ქალებში. ინტერვიუ აღებულ იქნა 6292 ქალისაგან ქვეყნის კველა რეგიონში. კვლევა ჩატარა საქართველოს შრომის, ჯანმრთელობისა და სოციალური დაცვის სამინისტრომ დაავადებათა კონტროლისა და საზოგადოებრივი ჯანმრთელობის ეროვნულ ცენტრთან ერთად. კვლევისას ტექნიკური დახმარება კვლევის დიზაინის, შერჩევის, კითხვარის შემუშავების, ტრენინგის, მონაცემების დამუშავებისა და ანალიზის საკითხებში ამერიკის შეერთებული შტატების დავადებათა კონტროლისა და პრევენციის ცენტრმა გაწია. „კვლევამ გამოავლინა ფიზიკური და სქესობრივი ძალადობის დაბალი მაჩვენებლები... უკანასკნელი 12 თვის განმავლობაში“.<sup>25</sup> კერძოდ, გამოკითხული ქალების მხოლოდ 1,4 პროცენტმა აღნიშნა პარტნიორისაგან ფიზიკური ძალადობის, ხოლო 0,5 პროცენტმა სქესობრივი ძალადობის შემთხვევები. სიტყვიერი ძალადობის მაჩვენებელი 8,4 პროცენტს უდრიდა, ქართველებში კი — 7,7 პროცენტს, რაც გენდერული თანასწორობის სტატუსის მიხედვით მაღალი გენდერული თანასწორობის მაჩვენებელია.<sup>26</sup>

2010 წლის ქალთა რეპროდუქციული ჯანმრთელობის კვლევამ გამოავლინა, აგრეთვე, ცოლისა და ქმრის როლი და პასუხისმგებლობა ოჯახში. რესპონდენტთა დიდმა უმრავლესობამ — 71,5 პროცენტმა აღნიშნა, რომ მეუღლები ერთად ინაწილებენ ოჯახურ მოვალეობებს (ეთნიკური კუთვნილების მიხედვით: ქართველი — 73,5 პროცენტი), გამოკითხულ ქალების ნახევარმა — 49,6 პროცენტმა კი განაცხადა, რომ ოჯახში საბოლოო გადაწევეტილებას ქმარი იღებს

<sup>25</sup> ქალთა რეპროდუქციული ჯანმრთელობის კვლევა საქართველოში, 2000. თბ., 2012, გვ. 357.

<sup>26</sup> იქვე, გვ. 362, 365.

(ქართველი — 47,8 პროცენტი, სხვა — 60,3 პროცენტი), ქმარს სურს ყოველთვის იცოდეს სად არის მისი მეუღლე — 31,8 პროცენტი (ქართველი — 30,0 პროცენტი, სხვა — 43,0 პროცენტი), ქმარი ეჭვიანობს, რომ ცოლი სხვასთან დალატობს — 4,2 პროცენტი (ქართველი — 3,5 პროცენტი, სხვა — 8,1 პროცენტი).

ქალთა მიმართ ძალადობის საკითხები თითქმის ყველა კვლევაში განხილულია მეტად დაწერილებით. უამრავი და ხშირად თვით სტატისტიკოსებისათვისაც კი მნელად გასაგები ცხრილები აბრკოლებენ მის გამოყენებას. ამიტომ არის, რომ კვლევის შედეგად მიღებულ მონაცემებს თითქმის არავინ იყენებს. ანალიზიც არ არის სრულყოფილი. ერთ-ერთ კვლევაში აღნიშნულია, რომ საქართველოში „7-17 წლის ასაკის ბავშვების 59 პროცენტი სწავლასა და მუშაობას ერთმანეთს უთავსებს. მათი უმრავლესობა მიჩვეულია საკუთარ სახლში ყოველგვარი ანაზღაურების გარეშე მუშაობას“.<sup>27</sup> გაუგებარია, რას ნიშნავს საკუთარ სახლში ანაზღაურების გარეშე მუშაობა. თუ ბავშვი სოფლად მშობლებს ქმარება, ვთქვათ, ბოსტნეულის დარგვასა და მოყვანაში, ეს ჩვეულებრივი მოვლენაა, ბავშვის მოთხოვნილებაცაა, იგი იძენს შრომით ჩვევებს და გაუგებარია, რა მიჩვევაზე და ანაზღაურებაზეა საუბარი. რაც მთავარია, ეს იმასაც ნიშნავს, რომ ქვეყანაში 7-17 წლის ასაკის ბავშვების 59 პროცენტი სულაც არ უთავსებს ერთმანეთს სწავლასა და მუშაობას.

ოჯახში ქალთა მიმართ ძალადობის საკითხების შესწავლის შედეგად, ყველა მკვლევარი აღიარებს, რომ „საქართველოში შედარებით დაბალი რაოდენობა აღიარებს მათ მიმართ ფიზიკური ან სქესობრივი ძალადობის განხორციელების ფაქტს“,<sup>28</sup> ეს იმასაც ნიშნავს, რომ სხვა ქვეყნებთან შედარებით ძალადობის მაჩვენებლები ქვეყანაში დაბალია, რადგან იმავე გამოკვლევებში სწორადაა მითითებული, რომ „მსოფლიოს მასშტაბით განხორციელებული მრავალი კვლევა ადასტურებს, რომ ძალადობის მსხვერპლი ადამიანები ინფორმაციის გამუღაწებას ერიდებიან“,<sup>29</sup> ე. ი. ინფორმაციის სრულად მოპოვება სქესობრივი ძალადობის შესახებ შეუძლებელია. საერთოდ ადამიანს, და მით უმეტეს ქალს, არ ეპიტნავება მის ცხოვრებაში ვინმეს ჩახედვა (თუნდაც ეს ანონიმურად ხდებოდეს), ყველაფრის გამომზეურება და განსაკუთრებით მაშინ, როდესაც საქმე ინტიმური ცხოვრების სფეროს, ან ღალატს შეეხება. ცოლქმრული ცხოვრება

<sup>27</sup> ქალები და ბავშვები საქართველოში: სიტუაციური ანალიზი. თბ., 2000, გვ. 109.

<sup>28</sup> ქალთა მიმართ ოჯახში ძალადობის... გვ. 39.

<sup>29</sup> იქვე, გვ. 48.

და, მით უმეტეს, ინტიმური ისეთი ფაქტი სფეროა, რომ საჩოთიროა ყველაფრის თქმა და ყველაფერზე ლაპარაკი, რაც ზოგჯერ პირადი თავმოყვარეობის შელახვასაც გულისხმობს. აქ, ალბათ, ღირს ძველი ბერძენი ისტორიკოსის პლუტარქეს მონათხრობიც გავიხსენოთ ერთი რომაელის შესახებ, რომელიც საყველურებით აავსეს ყოველგვარი ღირსებით შექმულ, განათლებულ, ლამაზ და მდიდარ მეუღლეს-თან გაყრის გამო. რომაელმა ამის საპასუხოდ ფქი, რომელზედაც ლამაზი და მოხდენილი ფქსაცმელი ეცვა, გამოსწია და გარშემო მყოფთ მიმართა: ეს ფქსაცმელიც ახალი და კარგია, მაგრამ არავინ იცის სად მიჰყერსო.

ქალთა მიმართ ძალადობის საკითხების შესწავლის დროს ზოგი-ერთი კითხვა სრულიად უადგილოდ და არაურის მომცემად მიგვაჩნია. ერთ-ერთი კითხვა ითვალისწინებდა იმ მიზეზების შესწავლას, რომელთა გამოც ქალს შეუძლია მეუღლეს უარი უთხრას სქესობრივ კავშირზე, მაგალითად, იმ შემთხვევაში, თუ ცოლს არ სურს. გავტედავ და ვიტყვი, რომ საქმე სწორედ ისეა, როგორც დავით გურამიშვილი აღნიშნავს „ქაცვია მწყემსში“: „ქმარს რომ უნდოდეს მასთან მიდება, ეტყვის: დამეხსენ, მე არ მინდება“.<sup>30</sup> მაგრამ დავით გურამიშვილთან ისეთ ცოლზეა საუბარი, რომელიც „მალვითა, ფარვითა, ქურდულად პარვითა უცხოს კი მისცეს“, მთავარი აქ ისაა, თუ რატომ უვარდებით რესპონდენტს ლოგინში. ქართული სიბრძნე ამბობს: „ცოლ-ქმრის ამბავი მხოლოდ ლოგინმა უნდა იცოდესო“. და თუ ქმარმა მრავლისმომსწრე ლოგინში მეუღლე მრავალჯერ ნაცნობ საკითხზე ცოტა დაშინებითაც შეაწუხა, მით უმეტეს, „როცა სისხლი დუღს, ენა ფიცით არ იღლება“ და თუნდაც სურვილის გარეშე დაითანხმა, ეს უკვე ცოლის გაუპატიურებად ითვლება. საინტერესოა, რას დაარქმევენ ამ გამოკვლევის ავტორები საპირისპირო შემთხვევას.

„ცოლის გაუპატიურებასთან“ დაკავშირებით საინტერესოა ერთი ფაქტი, რომელიც დაკავშირებულია კოსმონავტ ნილ არმსტრონგთან, რომელმაც მსოფლიოში პირველმა დაადგა ფქი მთვარეზე. დიდი წნის წინათ წაკითხული ეს ფაქტი ჩემს მეხსიერებას დღემდე შემორჩა. ნილ არმსტრონგის ახლო ნაცნობი შემთხვევით ფარულად შეესწრო მისი მეზობელი ვოლსკის ცოლთან საუბარს. ვოლსკი ცილობდა ცოლი სქესობრივ კავშირზე დაყოლებინა, მაგრამ მეუღლის მხრიდან მტკიცე უარი მიიღო: სანამ კაცს ფქი მთვარეზე არ დაუდ-

<sup>30</sup> ქართული მწერლობა. ოცდაათ ტომად, ტ. VII, თბ., 1989, გვ. 556.

გამს, ამაზე არც კი იოცნებოთ. ნილ არმსტრონგმა ეს ამბავი ნაცნობის მხრიდან იცოდა და ორდესაც იგი მთვარიდან დედამიწაზე დაბრუნდა, მისი პირველი სიტყვები იყო: წარმატებას გისურვებთ, ბატონო ვოლსკი!

ის, რის შესახებაც ზემოთ ვისმჯელეთ, უშუალოდ უკავშირდება სქესსა და სექსუალურობას. მამაკაცი და საერთოდ მამრი უფრო მეტად ავლენს ინიციატივას სექსში. ცნობილ ამერიკელ ფსიქოლოგს დევიდ მაიერს მოჟავს ამის დამადასტურებელი ფაქტები. 177 გამოკვლეუაში, რომელმაც მოიცვა 130 000 კაცი, გაირკვა, რომ მამაკაცებს, ქალებთან შედარებით, გაცილებით ხშირად აქვთ შემთხვევითი სქესობრივი კავშირები და ასევე ხშირად ეწევიან მასტურბაციას.

ამერიკაში 1996 წელს ჩატარებული გამოკვლევის მიხედვით 251 000 პირველკურსელიდან ვაჟების 54 და გოგონების მხოლოდ 32 პროცენტის აზრით, „თუ ორ ადამიანს ერთმანეთი ნამდვილად მოსწონთ, მაშინ მათვის არ არის პრობლემა დაამყარონ სქესობრივი ურთიერთობა, თუნდაც ისინი ერთმანეთს ძალიან ცოტა ხანი იცნობდნენ“. ამასთან, 18-59 წლების ასაკის 3432 ამერიკელის გამოკითხვაშ აჩვენა, რომ ქალების 19 პროცენტი და მამაკაცების 54 პროცენტი „ყოველ დღე“ ან „რამდენჯერმე დღეში“ ფიქრობს სქესობრივ ურთიერთობებზე.<sup>31</sup>

გენდერული სხვაობა სექსუალურ განწყობაში გავლენას ახდენს მათ ქცევაზეც. მამაკაცები, მათ შორის დაოჯახებულებიც, გაცილებით ხშირად არიან სქესობრივი ურთიერთობების ინიციატორები, ვიდრე ქალები. როგორც მიუთითებენ, ცხოველთა სამყაროშიც მამრი უფრო აქტიურია სექსუალური პლანით და ნაკლებად მოძოხვნი პარტნიორის არჩევაში.<sup>32</sup> საერთოდ, სექსუალურ განწყობაზე უამრავი ფაქტორი მოქმედებს და მამაკაცებისა და ქალების სექსუალური განწყობა შეუძლებელია ყოველთვის იღეალურად დაემთხვეს ერთმანეთს. თაგი რომ დაგნებოთ მამაკაცისათვის ბუნებით მინიჭებულ სექსუალურ აქტიურობას, სულ უფრო დაძაბული ცხოვრების რიტმიც აღარ იძლევა ამის საშუალებას. ამიტომაა, რომ სექსოლოგებს სექსუალური ურთიერთობებისათვის დროის კველაზე უკეთს მონაკვეთად დილა მიაჩნიათ.

დასკვნის სახით შეიძლება თამამად ითქვას, რომ ისტორიულად საქართველოში სამართლებრივი ნორმები, ადათები, ტრადიციები

<sup>31</sup> Давид Майерс. Психология, Минск, 2001, с. 512.

<sup>32</sup> Давид Майерс. Социальная психология, Санкт-Петербург, 2001, с. 237.

და თვით ცხოვრების წესი ბევრად უფრო იცავდა ქალის ღირსებასა და პატვს, ვიდრე რიგ მეზობელ თუ ევროპის ქეყნებში, რა თქმა უნდა, იმდროინდელი საზოგადოებრივი ცნობიერების ფარგლებში. უკანასკნელ პერიოდში ჩატარებული გამოკვლევებიც გვიჩვენებს, რომ ქალებზე ძალადობის მაჩვენებლები დაბალია. მიუხედავად ამისა საერთაშორისო არასამთავრობო ორგანიზაციები არ ცხრებიან და მოვლენას ისე წარმოაჩენენ, თითქოს ქალების ჩაგვრისა და მათზე ძალადობის მეტი საქართველოში არაფერი ხდება, რათა პრობლემა შექმნან და მსუებ დაფინანსებაც მიიღონ. მართლაც, ასიათასობით ღირებულების, თუ მიღიონობით არა, გრანტებს ღებულობენ და სამაგიეროდ ისინი დამფინანსებლების ინტერესებს კბილებით იცავენ ეროვნული ინტერესების საზიანოდ. ამიტომ არის, რომ ასეთი ორგანიზაციების ხელმძღვანელები, მაგალითად, გიგაურები, ლომჯარიები, კოჟორიძეები, ეროვნული სატკივარის შესახებ კრინტს არ ძრავენ, პირში წყალს იგუბებენ და შხოლოდ გარეშე ძალის ინტერესების ყურმოკრულ დამცველებად გვვლინებიან. ისინი ყოველდღიურად ტელევიზიის ერთი არხიდან მეორე არხზე დარბიან და ცდილობენ, ყური გაუხედნონ მაყურებელს ქართული სულიერების, ქართული ცხოვრების წესის დაკინიხების მიზნით. მათი ასეთი სირბილი წააგავს ერთ ამბავს, რომელიც გამოჩნილ ინგლისელ მეცნიერს ერნესთ რეზერფორდს გადახდა თავს. იგი „საღამო ხანს თავის ლაბორატორიაში მიბრუნდა და იქ ერთი მოწაფე დახვდა.“

- ასე გვიან აქ რას აგეთებთ? — გაიკვირვა მეცნიერმა.
- ვმუშაობ.
- დღისით რითა ხართ დაკავებული?
- ვმუშაობ.
- დილითაც მუშაობთ?
- რასაკვირველია!
- ერთი ეს მითხარით, ყმაწვილო, — ჰკითხა პროფესორმა, — როდისლა ფიქრობთ?“<sup>33</sup>

გიგაურები, ლომჯარიები, კოჟორიძეები და მათი მსგავსნიც არ ფიქრობენ, ისინი შხოლოდ ტელევიზიის ერთი არხიდან მეორე არხზე დარბიან და თავიანთი ქვეყნის ინტერესების საწინააღმდეგოდ მოქმედებენ — თუთიყუშივით თავიანთი პატრონების აზრებს იმეორებენ, რის შესახებაც არაერთხელ დაიწერა ქართულ პრესაში. ისინი ამისთვის საქმაოდ დიდ გასამრჯელოს იღებენ. სულ ახლახან

<sup>33</sup> დიმილი. თბ., 2013, გვ. 92.

ეკა გიგაურს ტელევიზიაში კიდევაც წამოცდა — უცხოელები ორი მილიონით გვაფინანსებენ, ოღონდ არ დაუზუსტებია. — ლარით თუ დოლარით. ამ დროს ჩვენი ერისათვის, მართლაც, სასიცოცხლო ფონდებს ერთი თეთრითაც არავინ აფინანსებს — არც შინაური და არც გარეული (მაგალითად, დემოგრაფიული აღორძინებისა და დემოგრაფიული განვითარების ფონდებს. მათ მხოლოდ საკუთარი ძალებით უწევთ მუშაობა). შორს რომ არ წავიდეთ, რუსთაველის ფონდში მეტად საჭირო თემის — „თანამედროვე დემოგრაფიული ვითარება საქართველოში და მისი გაუმჯობესების გზები“ — დაუინანსება წლებია არ მოხერხდა, კატეგორიულად არ აფინანსებენ.

დასასრულ, მიგვაჩნია, რომ საქართველოში ქალთა ძალადობის შემაშფოთებელ ვითარებაზე საუბარი ზედმეტია. ჩვენი ეს მოსაზრება გამყარებულია სტატისტიკური მონაცემებითაც. ალისა დელტუვის წიგნში „ოჯახური ძალადობა“ მოყვანილია ქალების მიმართ ჩადენილი, მართლაც, შემაშფოთებელი მონაცემები. ჯერ კიდევ 1967-1973 წლებში მოძალადე მამაკაცების მიერ მოკლული იყო 17 500 ამერიკელი ქალი და ბავშვი. აშშ-ში მოკლულ ქალთა სამოცი პროცენტი მოკლულია საქუთარი ქმრის ან მეობარი მამაკაცის მიერ. რამდენიმე წლის წინათ რუსული გაზეთი „არგუმენტები და ფაქტები“ იტყობინებოდა: „რუსეთში ყოველწლიურად ქმრის მიერ ცემის შედეგად 12 ათასი ქალი იღუპება, ხოლო 54 ათასი სხეულის დაზიანებას იღებს“. შვედეთში პარტნიორის მსხვერპლია 16 ქალი, რაც წლის განმავლობაში ჩადენილი მკვლელობის ერთ მე-ექვსედს შეადგენს. ამ მონაცემების მიხედვით ქალებზე ძალადობის დონე (მაგალითად, მოსახლეობის ყოველ 100 ათას კაცზე მოძალადე მამაკაცების მიერ მოკლული ქალების რაოდენობა) შეუდარებლად უფრო მაღალია დასავლეთის ქვეყნებსა და რუსეთში, ვიდრე საქართველოში. ამავე დროს ქალზე ძალადობა უკანასკნელ წლებში საქართველოში რამდენადმე გაიზარდა, მაგრამ ამ მოვლენაში, ზემოთ აღნიშნულ ფაქტორებთან ერთად, გადამწყვეტ როლს ასრულებს სატელევიზიო არხები „რუსთავი-2“-ის მეთაურობით. ტელევიზია წლებია განაგრძობს უშინაარსო, მხატვრული და შემცნებით დირებულებას მოკლებული ფილმების ჩვენებას, რომლებშიდაც წინაპლანზეა წამოწეული აღვირა ხსნილი და გაუკულმართუებული სექსი, უაზრო მკვლელობები და სხვა საშინელება. „რუსთავი-2“-ის მმაცუა (ძევლი ქართული სიტყვაა, ვერაგს ნიშნავს) უფროსმა და უმრავლესმა თანამშრომელმა მსუქანი ჯამაგირის გამო კუჭს ზევით ვეღარ

აიხედეს, ყოფილ პრეზიდენტს საფლავში ყვებიან და მოსახლეობა ფიქიურად დაავადეს. ვანო ჯავახიშვილისა და კომედი შოუს მსგავსმა გადაცემებმა, იქს ფაქტორმა და ასევე სხვა გადაცემების უიურის წევრების უაღრესად პროვინციულმა დონეზე ახალგაზრდობა ხელიდან გამოგვაცალა. ძველი ბერძენი ფილოსოფოსი დემოკრიტე სექსს დროებით გაბრუებას უწოდებდა, ჩვენი ტელევიზიების ეკრანებიდან კი სულ გაბრუებულები იმშირებიან. ნუთუ გაშიშვლებული სექსის შემდეგ ჩვენს მსახიობებს არ რცხვენიათ, არ ჰყავთ დედა, მამა, დები, ძმები, შვილები, მეგობრები, მეზობლები... ასე ხომ ნამდვილად არ მოიქცეოდნენ წინა თაობის მსახიობები. ცნობილი ფრანგი მსახიობი ლინო ვენტურა ფილმში კოცნასაც კი ერიდებოდა, რადგან, როგორც თვითონ ამბობდა, მას ოჯახი, ცოლი და შვილები ჰყავდა. ჯერ კიდევ ლეონარდო და ვინჩი აღნიშნავდა: ადამიანს რომ შეეძლოს თავისი თავის დანახვა უდიდესი აღტყინების ჟამს, ადამიანთა მოდგმა დაიღუპებოდა. ბევრი ჩვენი ვითომ მსახიობი კიდევ, რომელთა ეკრაზე გამოჩენაც კი სამარცხვინოა, ქართული სულიერების, ქართული ოჯახის დაღუპვას ემსახურება. სწორედ ეროვნული გადაგვარების ასაცილებლად ბატონმა ლეგან ვასაძემ მიმართა ბადრი პატარკაციშვილის ოჯახს: „მივმართავ ბადრი პატარკაციშვილის ოჯახის წევრებს, მის მეუღლეს, ქალბატონ ინა გუდაგაძეს, მის დას, ქალბატონ ნანა პატარკაციშვილს, ასევე ბადრის ოჯახის ქონების მმართველ მოურავებს, — თქვენი ოჯახის მიერ კონტროლირებულმა ტელევიზია „იმედმა“ ამ ბოლო დროს ყველა რეკოდი მოხსნა უზნებობისა და უმსგავსობის ქადაგებაში. ამ საქმეში მან სააკაშვილის „რუსთავი-2“-საც აჯობა, ჩვენი საზოგადოების ბევრი წევრი გაოგნებული უსმენს იმ ბაკანალიას, რომელიც ტელევიმედის ეთერში მიმდინარეობს. რჩება შთაბეჭდილება, რომ თქვენ არ გეხმით და ამ ფორმით არცხვენთ ბადრი პატარკაციშვილის სახელს.

იმედი გგაქეს, რომ შეისმენთ ჩვენი საზოგადოების წევრების და, მათ შორის, ჩემს არაერთ შეგონებას და გამოასწორებთ მდგომარეობას თქვენს ტელევიზიაში<sup>34</sup>. ამ ცოტა ხნის წინათ მის უწმინდესობასთან, სრულიად საქართველოს კათოლიკოს-პატრიარქთან ილია II-სთან მქონდა საუბარი ქვეყანაში შექმნილ უმძიმეს დემოგრაფიულ პრობლემებზე. ეს პრობლემები მისივე ინიციატივით წმინდა სინოდსაც მოხსენდა. პატრიარქის მოსაზრებით, უმძიმესი დემოგრაფიული ვითარების გამო საჭიროა შეიქმნას მთავრობასთან მუდმივ-

<sup>34</sup> გაზ. „ასაგალ-დასაგალი“, #21, 2015.

მოქმედი საბჭო, ხოლო ახალგაზრდობის სულიერი და ზნეობრივი აღზრდისათვის, უპირველეს ყოვლისა, უნდა იზრუნონ მთავრობამ, ეკლესიამ და ოჯახმა. ჩვენი ბრძენი პატრიარქის ამ დიდ ეროვნულ მოწოდებას საჭიროა ტელევიზიებმაც რეალურად აუბან მხარი. პატრიარქთან საუბარში განსაკუთრებით გამოიკვეთა, აგრეთვე, მტკიცე ოჯახების შექმნის მნიშვნელობა ქართველი ხალხის ცხოვრებაში. ამასთან, ქალის როლზე ოჯახსა და საერთოდ საზოგადოებაში, საჭიროდ მივიჩნიეთ მოგვეტანა აკადემიკოს პაატა გუგუშვილის თავისთვად საინტერესო ციტატა, რომელიც მკითხველის მიერ ერთ-მნიშვნელოვნად შეიძლება არც იქნეს აღქმული: „ქალი, როგორც ქალი ყოველთვის დარჩება არა მხოლოდ როგორც მეუღლე და დედა, არამედ როგორც დიასახლისი, და არა მხოლოდ შვილების, არამედ საერთოდ სახლის დედა — როგორც ოჯახის სითბოს, სიტყბოების, მშვენიერების, მყუდროების, მეუღლის (ქმრის) ყოველდღიური სიმშვიდის, კაცოფილების, იმედის, ჰუმანურობის და დავანების დღენიადაგ განახლებადი წყარო. ამ უაღრესად აუცილებელი, უმაღლესი, უდიდესი და მარად ნათელი მოვალეობისაგან, რაც ქალს შრომის სქესობრივი დანაწილების ძალით თვით ბუნებამ და საზოგადოებამ დააკისრა, მისი ემანსიპაცია იმავდროულად ადამიანთა სულით და ხორცით ჯანსაღი მოდგმის აღწარმოების დეგრადაციის მომასწავებელი იქნებოდა“.<sup>35</sup> ამ ფონზე შეიძლება მკითხველს ინგლისური ხალხური სიბრძეეც შევახსენოთ: „სახლი, რომელშიც მამალი დუმს და დედალი ყიფის, უბედური სახლია“.



<sup>35</sup> პ. გუგუშვილი. საქართველოს სსრ მოსახლეობის აღწარმოების საკითხები. თბ., 1973, გვ. 73.